

Na osnovu člana IV.4.a) Ustava Bosne i Hercegovine, Parlamentarna skupština Bosne i Hercegovine, na sjednici Predstavničkog doma, održanoj 27. jula 2004. godine, i sjednici Doma naroda, održanoj 29. jula 2004. godine, usvojila je

Z A K O N

O OSNIVANJU INSTITUTA ZA STANDARDIZACIJU BOSNE I HERCEGOVINE

I - OSNOVNE ODREDBE

Član 1.

1. Ovim zakonom osniva se Institut za standardizaciju Bosne i Hercegovine (u daljem tekstu: Institut) kao samostalna državna upravna organizacija, uređuje njegov položaj, nadležnost, ovlaštenja i druga pitanja od značaja za organizaciju, funkcioniranje i rad Instituta.

2. Institut preuzima poslove u području standardizacije i ocjenjivanja usklađenosti koji su utvrđeni u Zakonu o osnivanju Instituta za standarde, mjeriteljstvo i intelektualno vlasništvo Bosne i Hercegovine („Službeni glasnik BiH“, br. 29/00 i 19/01), u skladu s ovim zakonom.

Član 2.

1. Institut, u okviru djelokruga utvrđenog ovim zakonom, obavlja upravne i druge stručne poslove u okviru prava i dužnosti države Bosne i Hercegovine, ako ti poslovi nisu stavljeni u nadležnost drugih državnih organa, odnosno ako nisu zakonom povjereni drugim organizacijama i zajednicama.

2. Institut provodi nadzor nad izvršavanjem zakona i drugih propisa iz nadležnosti Instituta na teritoriji države Bosne i Hercegovine, ako drugim propisom nije drugačije uređeno.

3. Bosna i Hercegovina putem Instituta ostvaruje članstvo i saradnju s odgovarajućim međunarodnim i evropskim institucijama i sa sličnim nacionalnim institucijama u području standardizacije putem članstva, javne komunikacije, razmjene dokumentacije, tehničke pomoći, edukacije i drugih oblika, zavisno od prirode i načina njenog ostvarivanja.

Član 3.

1. Institut ima svojstvo pravnog lica.

2. Sjedište Instituta je u Srpskom Sarajevu.

3. U entitetima se mogu formirati institucije za standardizaciju u skladu sa Zakonom o standardizaciji BiH („Službeni glasnik BiH“, br. 29/ 00 i 19/ 01).

Član 4.

1. Rad Instituta dostupan je javnosti.

2. Javnost rada Instituta može se ograničiti ili isključiti samo u slučajevima utvrđenim zakonom.

3. Institut osigurava jednak položaj svim strankama u skladu sa Zakonom o upravnom postupku („Službeni glasnik BiH“, br. 29/02).

4. U Institutu se osigurava odgovarajuća nacionalna zastupljenost državnih službenika i zaposlenika u skladu sa zakonom.

Član 5.

1. Institut ima pečat, koji je izrađenu skladu sa Zakonom o pečatu institucija Bosne i Hercegovine, („Službeni glasnik BiH“, br. 12/98 i 14/03).
2. Na zgradi, u kojoj je smješten Institut, mora biti istaknut naziv Instituta i državni grb.
3. Naziv Instituta mora biti ispisan na bosanskom, hrvatskom i srpskom jeziku, latiničnim i ćiriličnim pismom.

Član 6.

1. U Institutu su u ravnopravnoj upotrebi službeni jezici: bosanski, hrvatski i srpski.
2. Službena pisma su latinica i ćirilica.
3. U postupku pred Institutom mogu se koristiti i drugi jezici koji nisu u službenoj upotrebi.

II - NADLEŽNOST INSTITUTA

Član 7.

1) Institut, kao državna naučno-stručna institucija, nadležan je da:

a) U području standardizacije:

predlaže strategiju standardizacije u Bosni i Hercegovini, priprema i izdaje bosanskohercegovačke standarde, zastupa i predstavlja Bosnu i Hercegovinu u međunarodnim i drugim međudržavnim organizacijama za standardizaciju, te obavlja poslove koji proizilaze iz međunarodnih sporazuma i članstva u tim organizacijama, učestvuje u pripremanju tehničkih propisa, razvija i uspostavlja informacijski sistem o standardima i drugim srodnim dokumentima, proglašava standarde BiH, organizira i provodi specijalističko obrazovanje kadrova u području standardizacije, bavi se izdavačko-publicističkom djelatnošću iz područja standardizacije.

b) U području ocjenjivanja usklađenosti:

učestvuje u uspostavi i održavanju sistema certificiranja i homologizacije u skladu s evropskim modelom. Zastupa Bosnu i Hercegovinu u evropskim i međunarodnim organizacijama za ocjenjivanje usklađenosti (EOTC i EUROLAB, itd) do formiranja asocijacije ispitnih laboratorija i asocijacije kalibracionih laboratorija i organizira obrazovanje iz područja ocjenjivanja usklađenosti.

III - UNUTRAŠNJA ORGANIZACIJA

Član 8.

1. Unutrašnja organizacija Instituta zasniva se na principima utvrđenim Zakonom o upravi („Službeni glasnik BiH“, broj 32/02) i Zakonom o državnoj službi u institucijama Bosne i Hercegovine („Službeni glasnik BiH“, br. 19/02 i 35/03).
2. Unutrašnja organizacija Instituta uređuje se Pravilnikom o unutrašnjoj organizaciji koji donosi direktor Instituta, uz saglasnost Vijeća ministara Bosne i Hercegovine.

IV - RUKOVOĐENJE INSTITUTOM

Član 9.

1. Institutom rukovodi direktor.
2. Direktor predstavlja i zastupa Institut, odgovoran je za obavljanje posebnih zadataka utvrđenih odlukama Vijeća ministara Bosne i Hercegovine, organizira i osigurava zakonito i efikasno obavljanje poslova, donosi propise kada je za to zakonom Bosne i Hercegovine ovlašten, izdaje druge akte za koje

je ovlašten i poduzima druge mjere iz nadležnosti Instituta, te odlučuje, u skladu sa zakonom, o pravima, obavezama i odgovornostima državnih službenika i zaposlenika u vršenju službe.

3. Direktor Instituta ima zamjenika, koji ga zamjenjuje ukoliko on nije u mogućnosti izvršavati svoja ovlaštenja i obaveze.

4. Direktora i zamjenika direktora imenuje Vijeće ministara Bosne i Hercegovine, po prethodno pribavljenom mišljenju Agencije za državnu službu a u skladu sa Zakonom o upravi („Službeni glasnik BiH“, broj 32/02).

5. Mandat direktora i zamjenika direktora traje pet godina i može se produžiti za još pet godina, tako da najduži period postavljanja na isto radno mjesto traje deset godina.

Član 10.

Rukovodeći državni službenici pomažu direktoru u rukovođenju pojedinim područjima rada.

Član 11.

1. Direktor Instituta dužan je, za svaku godinu, donijeti program rada i podnijeti izvještaj o radu.

2. Program rada i izvještaj o radu podnose se Vijeću ministara Bosne i Hercegovine na način i po postupku utvrđenim Zakonom o ministarstvima i drugim organima uprave Bosne i Hercegovine („Službeni glasnik BiH“, br. 5/03 i 42/03).

V - DRŽAVNI SLUŽBENICI I ZAPOSLENICI

Član 12.

1. Poslove osnovnih djelatnosti koji su ovim zakonom stavljeni u nadležnost Instituta obavljaju državni službenici, koji se postavljaju na radna mjesta utvrđena Zakonom o državnoj službi u institucijama Bosne i Hercegovine („Službeni glasnik BiH“, br. 19/02 i 35/03).

2. Kategorije u okviru radnih mjesta koja obavljaju državni službenici utvrđuju se Pravilnikom o unutrašnjoj organizaciji Instituta.

3. Postavljanje državnih službenika na radna mjesta u Institutu, njihova prava, obaveze i odgovornosti i druga statusna pitanja, plaće i druga materijalna primanja državnih službenika, kao i sprječavanje sukoba interesa u obavljanju dužnosti državnih službenika uređuju se u skladu sa Zakonom o državnoj službi u institucijama BiH („Službeni glasnik BiH“, broj 19/02 i 35/03) i drugim posebnim zakonom.

4. Pomoćno-tehničke poslove u Institutu obavljaju zaposlenici, u skladu s važećim propisima.

5. Prijem zaposlenika u radni odnos, prava, obaveze, odgovornosti i druga statusna pitanja, kao i plaće i druga materijalna primanja zaposlenika, uređuju se u skladu s posebnim zakonom.

VI - SREDSTVA ZA FINANSIRANJE INSTITUTA

Član 13.

1. Institut se finansira iz budžeta Bosne i Hercegovine.

2. Sredstva za rad Instituta utvrđuje Parlamentarna skupština Bosne i Hercegovine, na prijedlog Vijeća ministara Bosne i Hercegovine.

3. Sredstva za rad Instituta čine: sredstva za plaće i naknade, sredstva za materijal i usluge, sredstva za kapitalna ulaganja i sredstva za programe posebne namjene.

4. Sredstva iz budžeta Bosne i Hercegovine osiguravaju se u skladu sa Zakonom o izvršenju budžeta institucija Bosne i Hercegovine.

5. Direktor Instituta je naredbodavac za pripremu predračuna budžetskih sredstava i izvršenje finansijskog plana.

VII- PRIJELAZNE I ZAVRŠNE ODREDBE

Član 14.

1. Institut za standarde, mjeriteljstvo i intelektualno vlasništvo Bosne i Hercegovine, koji je osnovan Zakonom o osnivanju Instituta za standarde, mjeriteljstvo i intelektualno vlasništvo Bosne i Hercegovine („Službeni glasnik BiH“, br. 29/00 i 19/01) prestaje s radom nakon isteka 60 dana, računajući od dana davanja saglasnosti Vijeća ministara Bosne i Hercegovine na Pravilnik o unutrašnjoj organizaciji Instituta.

2. Zajednička komisija koju imenuje Vijeće ministara Bosne i Hercegovine, a sačinjavaju je predstavnici Instituta za standarde, mjeriteljstvo i intelektualno vlasništvo Bosne i Hercegovine i predstavnici novoosnovanih instituta u skladu s članom 13. stav 3. Zakona o osnivanju Instituta za standarde, mjeriteljstvo i intelektualno vlasništvo Bosne i Hercegovine („Službeni glasnik BiH“, br. 29/00 i 19/01), i to: Institut za intelektualno vlasništvo Bosne i Hercegovine, Institut za standardizaciju Bosne i Hercegovine i Institut za mjeriteljstvo Bosne i Hercegovine, odredit će način preuzimanja i raspoređivanja poslova, opreme, arhive i novčanih sredstava i preuzimanja državnih službenika i zaposlenika, koji se u tom svojstvu zateknu u Institutu za standarde, mjeriteljstvo i intelektualno vlasništvo Bosne i Hercegovine na dan stupanja na snagu ovog zakona.

3. Institut za standardizaciju Bosne i Hercegovine preuzima poslove, opremu, arhivu i novčana sredstva i državne službenike i zaposlenike danom potpisivanja zapisnika o izvršenoj primopredaji, sačinjenog od Komisije iz stava 2. ovog člana a u skladu s Odlukom o načinu preuzimanju poslova između ministarstava osnovanih ranijim Zakonom o Vijeću ministara Bosne i Hercegovine i ministarstvima Bosne i Hercegovine i ministarstava osnovanih Zakonom o ministarstvima i drugim organima uprave Bosne i Hercegovine („Službeni glasnik BiH“, broj 15/03).

Član 15.

1. Direktor Instituta za standardizaciju donijet će Pravilnik o unutrašnjoj organizaciji Instituta, najkasnije u roku od 60 dana, računajući od dana imenovanja na mjesto direktora.

2. Raspoređivanje državnih službenika i zaposlenika na odgovarajuće poslove i zadatke u skladu s Pravilnikom iz stava 1. ovog člana izvršit će se najkasnije u roku od 30 dana od dana donošenja Pravilnika o unutrašnjoj organizaciji Instituta.

Član 16.

1. Direktor, pomoćnici direktora i drugi rukovodni radnici Instituta za standarde, mjeriteljstvo i intelektualno vlasništvo Bosne i Hercegovine obavljaju svoje poslove do okončanja redovne zakonske procedure izbora na navedena radna mjesta, u skladu s Pravilnikom o unutrašnjoj organizaciji Instituta.

2. Prava rukovodnih radnika koji su stavljani na raspolaganje rješavaju se u skladu sa Zakonom o državnoj službi u institucijama BiH i Pravilnikom o radnim odnosima Instituta.

Član 17.

Sva rješenja, odluke i ostala akta u području standardizacije i ocjenjivanja usklađenosti, koje je donio Institut za standarde, mjeriteljstvo i intelektualno vlasništvo BiH do dana stupanja ovog zakona na snagu, ostaju na snazi, dok u zakonskoj proceduri ne budu zamijenjeni.

Član 18.

Ovaj zakon stupa na snagu osmog dana od dana objavljivanja u „Službenom glasniku BiH“.

Predsjedavajući
Predstavničkog doma
Parlamentarne skupštine BiH
Martin Raguž, s.r.

Predsjedavajući
Doma naroda
Parlamentarne skupštine BiH
Goran Milojević, s.r.
